

FUNDACION 18 DI MAART A SER FUNDA

Diario 11-3-'91



ORANJESTAD (AAN) Diabierna, dia 8 di Maart, a ser funda dilanti di Notaria Mr. M.A. Eman, e Fundacion "Fundacion 18 di Maart."

E Fundacion aki tin como meta contribui na e sentimento di nacionalismo di e Pueblo Arubano door di acentua y tene bibo desaroyonan, acontecimentonan y recuerdo di personanan cu a influencia y determina grandemente tanto e presente como e futuro di e pais Aruba.

E Fundacion a escohe pa su nomber e fecha di 18 di Maart pasobra e dia nacional aki di Aruba ta conecta e nacionalismo y e lucha di e generacionnan anterior y e generacionnan despues.

Den e trayectoria di mas di 60 aña cu Aruba a lucha pa ta un pais ariba su mes, un cantidad grandi di hende di un forma of otro a lucha y sacrifica sea como lider of como un estimulador y contribuido, den otro forma, pa Aruba a bira pais. Un pais no solamente den e sentido juridico di e palabra, pero tambe emocionalmente y moralmente.

Hopi vez esnan cu a traha den organizacionnan of comisionnan of cu a compone nos himno, of cu decadanan pasa a inicia e lucha, of cu durante añanan a sostene cu alma y cuerpo e lidernan di e lucha Arubano ta ser lubida na momento di reconocimiento.

Ta e intencion di e Fundacion 18 di Maart, pa reconoce e personanan aki y pa bay contribui na trece na conocimiento di nos pueblo e desaroyonan, eventonan y personanan clave den e trayectoria largo pa Aruba a bira pais.

Un monumento lo ser dedica na e personanan y momentonan historico aki.

Miembronan di e Fundacion ta:

Sra. Mary Silvany Filomena Wever Lacle, Presidente.; Sr. Hyacinthus Thomas (Chinto) Erasmus, Vice Presidente; Sr. Dominico Guzman Croes, Secretario; Sr. Casper Enrique (Capeis) Lacle, Tesorero; Sr. Angel Francisco (Palan) Croes, Miembro; Sr. Albert Maximiliaan (Albertico) Arends, Miembro;

Sr. Carlos Emiterio (Cai) Odor, Miembro; Sr. Joaquin Vries, Miembro; Sr. Rodolfo Cirilio Oduber, Miembro; Sr. Felix Simon (Shemmy) Coronel, Miembro; Sr. Benigno (Chonai) Roos, Miembro.

E Fundacion ademas tabata contento cu ariba dia di hende muher nan por a nombra un hende muher den persona di Mary Wever Lacle como nan Presidente. E ta yiu muher di un expolitico, difunto Netty Lacle, kende tambe a contribui grandemente na e lucha pa Aruba a bira pais y na e nacionalismo Arubano.